



**MENTERI SUMBER MANUSIA
KENYATAAN MEDIA**

**KEMENTERIAN SUMBER MANUSIA MEMPERKASAKAN PERLINDUNGAN
KESELAMATAN SOSIAL BAGI KESEJAHTERAAN SOSIAL YANG INKLUSIF**

1. Hari ini kita akan sama-sama meraikan Majlis Sambutan Tahun Baharu Cina PERKESO 2023. Saya gembira dapat meraikannya bersama hampir **160 orang ibu tunggal, anak-anak yatim dan penerima faedah Pertubuhan Keselamatan Sosial (PERKESO)**.
2. Saya juga berbesar hati apabila diminta menyampaikan sumbangan yang berupa angpow, hamper dan bayaran faedah kepada mereka, yang diharap dapat sedikit sebanyak menggembirakan mereka dalam menyambut perayaan Tahun Baharu Cina tidak lama lagi.
3. Saya juga ingin mengambil kesempatan ini untuk mengumumkan inisiatif yang diambil oleh Kementerian Sumber Manusia (KSM) bersama agensinya, PERKESO untuk **memperluaskan lagi liputan dan menambah baik perlindungan keselamatan sosial**.
4. Antara langkah yang sedang diambil termasuk **semakan semula dan pindaan ke atas Akta Keselamatan Sosial Pekerja 1969 (Akta 4) dan Akta Sistem Insurans Pekerjaan 2017 (Akta 800)**.
5. Akta 4 memberi perlindungan kepada pekerja di sektor formal termasuk pekerja asing dan pekerja domestik manakala Akta 800 melindungi pencarum yang kehilangan pekerjaan. Selain itu, perlindungan keselamatan sosial PERKESO juga meliputi individu bekerja sendiri di sektor informal dan golongan suri rumah, menerusi **Akta Keselamatan Sosial Pekerjaan Sendiri 2017 (Akta 789)** dan **Akta Keselamatan Sosial Suri Rumah 2022 (Akta 838)**.

6. Keputusan untuk menyemak semula dan meminda kedua-dua Akta ini bertujuan melancarkan proses permohonan faedah dan penyampaian manfaat keselamatan sosial oleh PERKESO, sekaligus memastikan tiada sesiapa yang tercicir, atau “no one is left behind”.
7. Ini adalah salah satu komitmen yang akan saya laksanakan sebagai Menteri Sumber Manusia, demi kesejahteraan rakyat Malaysia.
8. Antara penambahbaikan faedah PERKESO termasuklah **perluasan Skim Keilatan kepada pekerja asing dan pekerja domestik** dan juga **perlindungan terhadap kehilangan pekerjaan kepada golongan bekerja sendiri**.
9. PERKESO juga akan memperkenalkan **perlindungan yang tidak berkaitan dengan bencana kerja, faedah cuti bersalin**, serta **perlindungan warga tua**.
10. Semakan semula ke atas akta-akta tersebut telahpun bermula dan KSM kini sedang mempersiapkan Kertas Kabinet untuk dibentangkan kepada Jemaah Menteri.
11. Saya berharap usaha ini akan dapat memastikan setiap lapisan masyarakat memperoleh perlindungan keselamatan sosial yang sewajarnya dan pembangunan negara dapat dicapai secara inklusif.
12. Akhir sekali, sempena Tahun Baharu Cina yang akan disambut beberapa hari lagi, saya ingin mengucapkan “Xin Nian Kuai Le” dan “Wan Shi Ru Yi” kepada seluruh rakyat Malaysia yang berbilang kaum ini. Semoga tahun arnab ini membawa kemakmuran dan kesejahteraan kepada kita semua.

**YB TUAN V. SIVAKUMAR
MENTERI SUMBER MANUSIA
KUALA LUMPUR
19 JANUARI 2023**